

生日快樂

[1]

昌仔今日生日，佢七歲喇！

佢哥哥家姐想送一條金魚畀佢。

佢哋一齊坐小巴去金魚街。

[2]

條街好熱，上到小巴好凍。

有個伯伯話：「喂，唔該郁一郁，畀我坐一坐。」

[3]

到喇！到喇！

佢哋落咗小巴，條街好熱。

「嘩！有好多金魚！」

昌仔拍手大叫。

[4]

昌仔見到一條魚喺水度游嚟游去。

條魚個口又喺度郁下郁下。

[5]

昌仔問佢哥哥家姐：

「條魚係唔係口渴？條魚係唔係喺度飲緊水？」

哥哥答：「唔係。」

昌仔又問：

「噉條魚係唔係肚餓？條魚係唔係喺度食緊嘢？」

家姐答：「唔係。」

[6]

有個叔叔行過嚟，佢話條魚喺度呼吸緊。

叔叔又問：「細路，有冇邊條魚你想要？」

昌仔見到有一條魚，條尾又長又靚，

佢同叔叔講佢想要嗰條魚。

「呢條？好！噉不如要埋啲魚糧啦？細細粒，啲魚好鍾意食㗎。」

[7]

條街好熱，昌仔拎住一袋二袋，
跟住哥哥家姐一齊上小巴，小巴好凍。
條魚喺個袋度游嚟游去，佢個口又喺度郁下郁下。

000264:《生日快樂》Little Brother's Birthday Gift

The CC BY 4.0 license REQUIRES that any reused or repurposed content must have the correct ATTRIBUTION. Please use the text below in your citations, printouts and copyright pages.

Attribution Text

"Little Brother's Birthday Gift" (Cantonese), written by 趙婉慧, illustrated by 趙鵬琦, published by HamBaangLaang (© HamBaangLaang, 2022) under a CC BY 4.0 license on hambaanglaang.hk

[Find out more here: [HamBaangLaang Attribution terms and CC 4.0](#)]
